

बैगा बिहाव

मुरता गांव राहय ओ बैगा गांव राहय। उंहा अक डोकरी डोकरा अउर उंखर सामू नांव कर अक बेटा राहय। ओखर 18-19 उमर होय गै राहय। ओखर दाय बाबू बिहाव कर बारे म सोचिन। बैगा ले बैगाच बिहाव करथैं। तो अक दिन सामू कर दाय कथै, “तोर रांधन खवान वारे नैको आय। तोर बिहाव करतेन।” सामू हव कहिस।

फेर उन बिहाव कर तिआरी करिन अउर मांगेले जाबो कहके अक डब्बा मंद बनाईन। फेर उन गांव कर दुईझन सियाना ले धरिन। अउर उन अमली टोला गांव म गईन। उंहा घला बैगाच बैगा राहय। तो उन पेहली अमलीटोला कर अपन परिवार से गईन। तो उनले कथै, “हम टुरी मांगेले आयहेन। कते कते घर म है हम ले गुठया।” उन कहिन, “दुई घर म आहय।” तो घर वारे अउर उन भी गईन। तो जायके बैठिन अउर पुछिन, हम बेटी मांगेले आयहेन। तो उन कथै, “बेटी तो आहय। हा कही तब।” तो ओले सब कर बीच म बलाईन। ओखर बेटी कथै, “टुरा के देखहूँ तब हां कहूँ।” तो फेर टुरा ले देखाईन। तो फेर ओ हां कहिस।

टुरा कर बाबू चुटकी बनाईस मोहलाईन पान कर। तो अपन समधी अउर समधीन ले ओ म मंद देईस। फेर उन चुहायके पिईन। फेर सप्फोझन पिईन। फेर पि लईन, भत खाईन। अउर उंहे रात रहिन। फेर सकराहा बिहाव अउर फलदान के बात करिन अउर घर भग गईन।

फेर घर म जायके पतड़ी सिलिन अउर मंद बनाईन। चाउड, दाड लाईन। फेर गांव वारे संग फलदान गईन। फेर टुरी वारे घला गांव वारे ले बलाईन। तो फेर टुरी टुरा ले बलाईन अउर हरदी घसिन। टुरा कर दाय अउर टुरी कर दाय गोड म बैठाईन अउर गाल चुमिब। फेर मंद पिईन।

फेर काल मंडा राहखबो, दुसर दिन भांवर अउर ओखर दुसर दिन छडति पडति रही। थो उन फेर घर आय गईन। घर आयके लगिन जोड़िन अउर मंडा काटेले गईन। फेर उन मंघर ओनी आनके बनाईन अउर बीच दुआर म गडयाईन अउर मंडा ले छाईन।

मंडा राहय तोन दिन हरदी लगाईन। दुईठन नंगाड़ा बाजा राहय अउर रात भर नाचिन अउर ददरिया गाईन। फेर सकराहा बरात जाबो कथै। फेर उन दुई अक बजे बरात गईन। फेर टुरी वारे बरात ले परघाईन अउर ददरिया गाईन। फेर उन ले जुनवास लैजिन दुसर घर म। फेर मंद पिईन। फेर दुल्हा अउर दुल्हिन ले नचाईन अउर मुंदी पेहराईन। फेर खरची खोदै पटायके दुल्ही दुल्हा ले उठाईन। फेर दोसी डोकरा लगिन जोड़िस। फेर मंडा म भंवर किनजारिन। उंहा तीन भंवर किनजारिन अउर फेर बैठारिन। दोसी डोकरा गोड धोईस। फेर गांव वारे बटकी, कसेड़ी म घला गोड धोईन। फेर अक टिपा मंद निकालिन अउर फरिया देईन। फेर बिदा देईन।

घर म फेर दोसी डोकरा लगिन जोड़के फेर भंवर किनजारिस। घर वारे मंद निकालिन अउर गांव वारे इंहा घला गोड धोईन। फेर भात खाईन अउर घर भगिन। फेर दोसी डोकरा उन ले उठा देईस।

फेर सकराहा छडति पडती रहिस। दुल्ही दुल्हा ले दोसी डोकरा नहवाईस। फेर गांव वारे ले सिकारी बनाईन कुकड़ी सुरा मारेले। पांच अक घर गईन मारेले। मारके फेर भूजिन अउर काटके फेर रांधिन। फेर गांव वारे ले खायले बैठारिन। दुल्ही दुल्हा ले भात पोरोसवाईन। तो असने आय हमर पीढ़ी कर बिहाव। फेर दोसी डोकरा घला उनले भात खवाईस।

